

各位評判老師、各位同學：逐家好！今仔日，我欲講的故事是一老和尚佻小和尚。

佇莊跤的小廟內，蹓一个老和尚佻一个小和尚，小和尚是天真活潑，老和尚是迷信攔固執，若看到一寡較奇怪的事誌著會講：「這一定是神的指示」。

有一工，師徒兩人準備欲去替人念經，拄踏出廟門，老和尚的頭殼就予天頂飛過的厝鳥仔滴著鳥仔屎，老和尚講：「這是神明特別派來指示，叫咱毋通出門啦！」小和尚應講：「按呢講，天跤下所有的鳥仔屎，毋就攏是神的旨意了」老和尚[真生氣，責備小和尚對神明不敬，罰伊跪佇神壇頭前唸一工的經，才肯放伊煞。

因為佢無守信用，村民就約定一個月毋愛予小廟香火錢，結果師徒兩人只好淋泔糜仔過頓，定定枵甲無氣力通好唸經。

有一工，莊內閣有人請佢去唸經，交代佢這擺袂使閣失約个咧！因為驚厝鳥會攔飛來，隔轉工天未光，老和尚就 tshua7（帶）小和尚出門了。行到半路仔，小和尚急欲放尿，揣無便所，小和尚只好揣一个較媠僻（phiah4）的稻仔園，準備要方便的時，老和尚大聲喝講：「佇稻仔園放尿是會受到稻神的處罰矣！」小和尚只好忍耐，雄雄看到路邊一欉大欉樹仔，趕緊走去樹仔後，但是！老和尚閣罵講：「你敢毋知樹仔有樹神喔！」小和尚實在急甲強欲忍袂牢矣！毋過！聽到師父佇罵，只好牙齒根咬較紆咧，閣繼續趕路。

行到溪邊，聽到水流聲，小和尚心內想：「放落水底袂臭嘛袂垃圾，師父一定袂閣插」哪知！師父的雷公聲又攔響起：「溪底有溪神，佇遐放尿是萬萬不能！」

天啊！小和尚只好扭著褲沿路行沿路跳，看到路邊的土地公廟仔，趕緊走去廟後，老和尚大手共一扭！「我就知咧！按呢對神是大不敬矣！」小和尚足著急問講：「師父！

到底是啥物所在才會當放尿咧？我已經擋袂牢矣啦！」老和尚講：「只要無神的所在攏會使哩！」小和尚四邊看看咧！稻仔有稻神、樹仔有樹神.....到底是叨位才無神咧？急！急急急急急！小和尚急甲玲瓏慙！急甲歸身軀起雞母皮！急徭大粒汗小粒直直垂！雄雄目睷一下金！啊！有矣！小和尚趕緊走去老和尚的身軀邊，噓——「哇！足輕鬆矣！」這時，老和尚又驚又氣「喂！喂！喂！你這個徒弟實在真大膽，也敢佇師父的身軀放尿！」小和尚足無辜講：「師父是人，毋是神，弟子一切攏遵照師父的意思啊！」

我的故事就講到遮，感謝逐家！共 923 字